

08/08/2002

Kibar Jalur Gemilang secara sukarela bukti rakyat setia

Siswa Tani UPM

KEMPEN Mengibar Bendera Malaysia sempena sambutan Hari Bulan Kemerdekaan yang diadakan saban tahun bagi menggalakkan orang ramai menghayati makna kemerdekaan.

Sebelum itu, izinkan saya mendoakan agar pejuang kemerdekaan kita dicucuri rahmat.

Saya ingin mengulas usaha Kementerian Perpaduan Negara dan Pembangunan Masyarakat yang memperuntukkan sejumlah wang dalam mempromosikan Hari Bulan Kemerdekaan.

Saya ingin bertanya mengapa berjuta ringgit digunakan untuk membeli bendera bagi dibahagikan kepada rakyat Malaysia.

Kita pernah menyaksikan beberapa tahun lalu, rakyat dengan wang sendiri membeli bendera untuk dikibarkan menjelang sambutan Hari Kebangsaan.

Orang ramai dengan wang sendiri dengan begitu bangga membeli bendera dan mengibarkannya di mana saja.

Ada yang mengibarnya di rumah, kedai, bangunan, kereta, van dan motosikal. Rakyat Malaysia menunjukkan kesetiaan dan kebanggaan mereka terhadap negara dengan mengibarkan bendera. Mereka mengeluarkan wang sendiri untuk membeli Jalur Gemilang dan bukan dipaksa atau diberi secara percuma.

Sayangnya pada masa ini, kemeriahan itu bagaikan hilang begitu saja. Berapa ramai yang mengibarkan bendera pada Hari Kebangsaan? Kemeriahan seperti itu tiada lagi dan atas sebab itu mungkin kerajaan berpendapat bendera itu perlu diedarkan secara percuma. Dengan cara itu akan memeriahkan sambutan Hari Kebangsaan.

Menjelang sambutan Hari Kebangsaan, kita sebagai rakyat yang cintakan negara sepatutnya secara sukarela menunjukkan taat setia kepada Malaysia dengan mengibarkan Jalur Gemilang.

Perkara itu bukanlah kita lakukan sepanjang tahun, tetapi hanya pada Ogos.

Dalam menyambut Hari Kebangsaan ini, kita sepatutnya tidak lupa kepada setiap orang yang membolehkan kita bebas daripada cengkaman penjajah, tanpa mengira ideologi dan fahaman politik mereka.

Apa yang penting, kita perlu mengenang jasa mereka yang sama-sama berjuang untuk kemerdekaan negara.

Oleh itu, saya ingin mencadangkan agar Bulan Kemerdekaan yang akan di rasmikan Perdana Menteri, Datuk Seri Dr Mahathir Mohamad, pada 17 Ogos ini, turut dihadiri oleh semua pihak, termasuk parti pembangkang.

Dengan cara itu, barulah kita sama-sama dapat menghargai, menghayati dan menginsafi makna sebenar kemerdekaan.

Kalau kita sama-sama cintakan Malaysia yang aman, makmur dan maju ini, kita akan menjaganya dengan baik.

Alangkah baiknya jika semua pihak tidak kira pelbagai fahaman turun pada 31 Ogos ini untuk meraikan sambutan Hari Kebangsaan.

Kita sebagai rakyat Malaysia tidak kira bangsa, agama, keturunan serta fahaman politik dan ideologi perlu bersama-sama menunjukkan taat setia kepada negara tercinta.

SISWA TANI UPM,  
Serdang, Selangor.